

«Crisas san er esser ina schanza»

Grischun Vacanzas: radunanza generala

DA GION NUTEGN STGIER/FMR

■ **Nununsitada radunanza generala per l'organisaziun grischuna da turissem, Grischun Vacanzas. Gi lieu ha quella ier per livestream. Il Grischun è an Svizra anc adina la regiun che attira ils pli blers giasts. Dal dumber total da pernottaziuns da 5,2 milliuns fatgas il 2019 èn 61% giasts svizzers.** Emessa via livestream è la 22avla radunanza generala vegnida davent da Malans. A pled per video e quai davent dalla Chasa Grischuna a Cuir è lura er vegnì cusseglier guvernativ *Marcus Caduff*.

Da buna speranza

El ha ditg che strusch in'otra branscha saja pertutgada uschè fitg da las consequenzas dal coronavirus sco la branscha da turissem. Turissem saja er integrazziun sociala, viver ed occurrenz, ha ditg Caduff. Grischun munta qualitad, products e servetschs. Il cusseglier guvernativ lumentzian è da buna speranza pertutgant la stagiun vegnenta da stad, cun esser las vistas fitg bunas grazia a las bleras rezervaziuns da giasts svizzers. Quitads fa el plitost per la stagiun d'enviern 2020/21. Caduff è da l'avis che la pandemia n'è anc betg a fin, ch'in vaccin manca anc e che las directivas pervi da quel virus viral restan vinavant. Per l'entira branscha turistica saja quai ina gronda sfida. En cumina saja da chattar bunas soluziuns. Il schef dal departament da l'economia publica ha ditg che dumandada saja en quella chausa er la politica, e quai er la politica surchantunala. Crisas sajan dentant er ina schanza, e gist a quella crai er Caduff.

Ina stad solida

Jürg Schmid, il president da Grischun Vacanzas, ha ditg che l'onn passà saja stà in onn plaschaivel per il turissem grischun. Cun in plus da 2,4% da pernottaziuns tar ils hotels saja quai il terz onn en seria che



Discussiun bilaterala durant la radunanza generala da Grischun Vacanzas: Jürg Schmid, il president da l'organisaziun, e Martin Vincenz, il directur.

FOTO RTR

quel dumber saja s'augmentà. En temps da crisa sajan surtut ils giasts svizzers adina stads in garant per ina stabilitad turistica, e quai vegnia er questa stad, l'atun ed er l'enviern proxim ad esser uschè, ha ditg Schmid. El è persvas da star avant ina stad solida cun restar ils Svizzers en l'atgna patria per far vacanzas ed in bel dumber sa decider da vegnir en il Grischun. Internaziunal vegnia il turissem bain betg a sa revignir sche spert da la crisa dal coronavirus, ha manegià il president da Grischun Vacanzas. Viaggiar, quai tutga però tar il basegn fundamental, ha punctuà Schmid. El ha er ditg: «Faschai ina curva enturn il virus e vegni en il Grischun!»

Martin Vincenz, il directur da Grischun Vacanzas, ha preschentà il quint

annual da l'organisaziun che sera cun entradas e sortidas da bunamain 12 milliuns francs cun in pitschen gudogn. El ha er preschentà las acziuns da reclama per carmalar daplis giasts questa stad en il Grischun ed er l'enviern proxim. Da nov a la suprastanza da l'organisaziun fa part *Irene Müller*, la hoteliera da Zuoz. Ella remplazza la suprastanta partenta, la hoteliera *Corinne Denzler* d'Arosa, che surpiglia la direzziun d'in hotel en la Svizra Centrala.

Avant il Vallais

Il 2019 è il dumber da las pernottaziuns s'augmentà en il Grischun per 2,4% sin in total da 5,256 milliuns. Quai èn tuttina 124 000 pernottaziuns dapli che anc l'onn avant. En cumparaziun cun las per-

nottaziuns fatgas il 2009 è quel dumber per 629 000 pernottaziuns pli bass. 61% da las persunas che han pernottà il 2019 en in dals 700 hotels en il Grischun derivan da la Svizra e 16% da la Germania. En media èn ils giasts stads be 2,6 dis en in hotel grischun l'onn passa. Avant diesch onns eran quai anc 3,1 dis. Guardà naziunal han ils hotels da noss Chantun fatg il 2019 bunamain in milliun daplis pernottaziuns ch'ils hotels en il Vallais, dentant 200 000 damain pernottaziuns ch'ils hotels en il chantun Berna. Ils hotels dal Tirolo han fatg l'onn passà 30 milliuns pernottaziuns, e quels en il Tirolo dal Sid 25 milliuns pernottaziuns. Remarcabel è lur tuttina che tar il dumber dals giasts svizzers han quellas duas regiuns pers bunamain 20 pertschient.